


INGURUMENA. 2002-2016 Gipuzkoako Hiri Hondakinen Kudeaketarako Plan Integrala aztertzen ari dira orain

Gipuzkoako mankomunitateek oro har egokitzen jo dute Aldundiaren plana

Eguzki talde ekologistakoek, berriz, esan dute ez dutela horrelakorik onartuko



GARI GARAIALDE

San Markosko zabortegia, Gipuzkoan dagoen handiena, 2005erako itxi egin behar dute.

ESANAK

XABIER ERAUSKIN

Sasieta Mankomunitateko teknikaria

«Garraioa gogoan izanik, kostu bera izan dezake errausteko planta bat edo hiru jartzeak»

M. ANGEL MUÑAGORRI

Txingudi Mankomunitateko lehendakaria

«Beharrezkoa da Txingudin kudeaketa integratu bat izatea»

XABIER LANDA

San Markos Mankomunitateko lehendakaria

«Bizkaiko ereduarekin aldea badago: han kudeaketa pribatua da»

GARIKOITZ PLAZAOLA

Eguzkiko ordezkaria

«Sortzen den zabor kopurua murriztu egin behar da: hor da koxka»

liñaki Petxarroman | DONOSTIA

Gipuzkoako mankomunitateak aztertzen ari dira Foru Aldundiak egindako 2002-2016ko Hiri Hondakinak Kudeatzeko Plan Integralaren aurrerapen txostena. EGUNKARIAK mankomunitate batzuetako ordezkariak iritzia galdetu die, eta, oro har, azterketa ontzat jo dute.

EGUNKARIAK joan den igandeko zenbakian aurreratu zuen txostenaren mamia. Hor Aldundiak hiru alternatiba —zazpi azpialternatibatan banatuta— aztertutako konpostatu eta birziklatzen ez den zaborrarekin zer egin erabaki ahal izateko. Orain, azterketa mankomunitateen iritziekin osatuko dute, eta gero erabakiko dute zer azpiegitura egin eta non. Laburbilduz, azterketa horretan Aldundiak dio errausteko planta dela zaborra kudeatzeko modurik «merkeen eta jasangarriena».

Xabier Erauskin Sasieta Mankomunitateko teknikariaren iritziz, baina, hori ez da guztiz horrela. «Ingurumen ikuspegia aplikatu zaie aukera guztiei, eta esan daiteke maila pertsuan daudela, alegia, erraustea bezain onak izan daitezkeela beste biak».

Ikuspegi ekonomikoan ere ikusten du hutsunerik Erauskin, ez baita kontuan hartzen kostuak konparatzen direnean

garraioak ekarriko duen gastua. «Kostu bera izan dezake errausteko planta bakarra jartzeak edo ta hiru jartzeak, garraioak izango duen kostuagatik».

Erauskinak adierazi duenez, «txosten ona eta aurrerakoa» da Aldundiak egin duena. Hala ere, oraingoz pieza askotako «puzle» bat dela dio, eta erabakia hartu aurretik aukera guztiak ondo aztertu behar direla esan du.

Txingudik azpiegitura berezkoa nahi du

Miguel Angel Muñagorri Txingudi Mankomunitateko lehen-

dakariak ere «ongi» ikusi du Aldundiaren txostena. «Azken finean Txingudirako egin dugun planaren funtsa bere egiten duelako».

Kudeaketa integratuaren filosofia oso egokitzen jo du Muñagorri: «Europako direktiba mahai gainean jarrita, azterketa sakona eginda lurraldearen inguruan, gestio integratu baten aldeko apustua egiten da».

Muñagorriren ustez, gaur egun zabortegiak —eta gutxiago Gipuzkoa bezalako lurralde batean— ez dira «jasangarri eta onargarriak». «Zaborra ez da

besterik gabe zulo batera bota behar den baliorik gabeko gauda. Berrerabili eta energia sortzeko erabili behar den lehengai da, eta hala hartu behar da».

Muñagorri dio «beharrezkoa» dela errausteko planta bat jartzea Txingudin, Hendaiarekin batera mugaz gaindiko zaborren tratamendu integratuaren alde egin duten apustua aurrera eramateko. Haren ustez, aurretratamendu mekanikobiologikorako planta ez da alternatiba bat, harekin batera zabortegi bat eta errausteko plan-

ta bat behar dituelako. «Gipuzkoari begirada zorrotza emanda, ez da alternatiba». Gainera, azken urte hauetan egin diren aurrerapenekin eta dauden kontrolekin, horrelako azpiegituren kutsatzeko ahalmena asko murriztu dela dio.

Xabier Landa San Markosko Mankomunitateko lehendakariak adierazi duenez, oraindik ez dute azterketa sakonik egin, ez mankomunitatean ez bere alderdian ere (Batasuna). Hala ere, eztabaidaren funtsa errausteko plantaren inguruan egongo dela uste du.

«Bizkaian kontra egin dugu, baina han alde nabarmena dago: kudeaketa pribatua da. Zenbait enpresa daude Zabalgarbin, Iberdrola, BBK... Eta haien interesa da ahalik eta etekin gehien ateratzea». Gipuzkoan, berriz, kudeaketa publikoa da, udalen esku dago, eta planteamendua ezberdina da: ahalik eta gehien birziklatu eta geratzen denarekin zer egin erabaki.

Landak hutsuneak ikusten ditu azterketan: adibidez, zaborren ekoizpenean aurreikusten duen igoera nabarmenari aurre egiteko ez dela indarrik egiten. 2000. urtean 401.661 tona zabor sortu ziren Gipuzkoan, eta 2016rako 541.996 tona sortzea aurreikusten da.

EKOLOGISTEN IRITZIA

Xede horiekin, aurrean izango dutela dio Eguzkik

Eguzki elkarte ekologistako ordezkari Garikoitz Plazaolak gogor salatu du Aldundiak aurrera eraman nahi duen plangintza. «Oinarrian 1996an egin zuen plantamendu bertsua da». 1996an Aldundiak baztertu egin zuen errausteko planta jartzea, garestiegia zelako. «Diferentzia da sei urte galdu ditugula, eta orain aukera gutxiago dugula mugitzeko».

Plazaolak dioenez, 1996an hartutako konpromisoak «erabat ahaztu» ditu Diputazioak. «Konpostatzearekin eta birziklatzearekin urrats batzuk egin dituzte, baina orduan esaten zen gipuzkoar bakoitzak sortzen duen zabor

kopurua murriztu egin behar zela, baina egin dugun bakarra sortzen den zabor kopurua igotzea izan da». Gainera, 2016an sortuko den zabor kopurua nabarmen handituko delako aurreikuspena gogor gaitzetsi du. «Hor ikusten da, oinarri-oinarrian zein den egin beharreko lana. Zaborra murriztea, konpostatze, birziklatze eta beste zenbait planekin osatzea; izan daiteke hemen aipatzen den planta mekanikobiologikoei edo bestelako batzuekin. Neurri horiek uztartuz gero, kudeaketa nahiko jasangarri batera hel gaitzetzeko».

Eguzki kexatu da Gipuzkoako Foru Aldundiak oraindik ez duelako ekologisten iritzirik eskatu gai honen inguruan. Ildo horretan, plangintzan agertzen den bidetik segituz gero, Eguzki aurrean izango dutela ziurtatu du Plazaolak.